

# PEDRO-GARDA-GEBED

## 1 PEDRO

### GEBE-SOGLENAID

#### Garda-nug

Pedro, Jesús-e-sapingan-bur-dummagan-warambe-gakabogwad-wargwenad gued. We-dule, gebegi Simón'ye nugad. Jesús ega nug-baid uksabalid, Pedro'ye onugsasad. (Juan 1:42) Pedro, Judío'mar-abargi bur arbasad. Judío-dummagan Jesús-nakrusgi-oburgwega igar-itonanaigua, Pedro ilapaa Jesús-osulos gusad. Geb a-sorbali, Pedro mag neg-itosnadgua, Pedro, Jesús'ba-nanaimalad gannar amis gusad. Pedro gwenadgan-abargi emar-idugega dule-dummadga gunonigusad. Binsamalad, we-garda birga 63'gi narmakles-insaye.

#### Pedro-Garda-Gebegi weyob sunmaklenaid

Bab-Burba-Isligwaledbali, Pedro gwenadgan-yar-baid-baidgi-bukmaladse we-garda narmaksad. Adi, gwenadgan-Jesús'ba-nanaimalad-ogannogegar. Gwenadgan-Jesús'ba-naidbali nue-naibi-itodimaladga Pedro sognaid, we-naibi-itogedi unnila ichee naguoye. Ar a-sorbali, Bab-Dummad bur-nued bemargi binsaoye.

We-gardagine, weyob ilemakar sunmaklenaid:

1. Gebe-sikwas-soglenaid (1:1-12).
2. Cristo'gi burba-binid-nikgued (1:13—2:10).
3. Jesús'ba-nanaimalad ibmar imakergebed (2:11—4:6).
4. Neg-bergudanikid-idu, Bab-Jesús'ba-nanaimalad igi-damalargebe (4:7-19).
5. Unalemalad (5:1-11).
6. Napi-soglenaid (5:12-14).

Be itogua.

---

#### 1. GEBE-SIKWAS-SOGLENAID (1:1-12)

**1** <sup>1</sup>Ani Pedro, Jesucristo-e-sapin-dummadga-nugsalesmogadid. We-garda, an bemar-na-e-yargi-gudisurmaladse an narmaknaid: Ponto-yargi-bukmaladse, Galacia-yargi-bukmaladse, Capadocia-yargi-bukmaladse, Asia-yargi-bukmaladse, degine, Bitinia-yargi bukmaladse an narmaknaid.

**2** Bab-Dummad anmar-Babga-gumaid, bato e-igar-maidba, e-ibmar-wisidba be e-dulamarga-guega sulesmalad. Bemar Bab-Burba-Isligwaledgi Bab-Dummadgadgarbi-gumalaga be sulesmalad, adi, uaya-nikaa damalaga, degi, Jesucristo-abegi nugumalagar.

Bab-Dummad bemargi bela-bela nued binsasun, degine, bela-bela ulubgi-bogidik-itogega be-imakbarsun.

### **Jesús-dula-gudiid-ular, anmar dulagudigued edarbedimarmogad**

**3** Bab-Dummad-nug odummolesun. We-Bab-Dummad anmar-Dummad-Jesucristo-e-babad. Bab-Dummad nue-wile anmar-dakedba Jesucristo-burgwar-mai-durgusadgi gannar-gwalulegega anmar-imaksad. Adi, agi anmar Jesús-dula-maidgi dulagudigued-edarbedii guegar. **4** Adi, bemarga ibmar-nibneggi-abingaoed uklegegar. We-ibmar-anmarga-uklegoye-sogsad geg Bergued, geg Isquared, degine, geg gaganyob dingubalid.

**5** Bemar-Jesucristo'gi-bensulidba, Bab-Dummad na e-ganguedgi bemar-akwedisunnad. Adi, bemar-abonolesad bemarga-guagwar-sabolesadi, ibagan-berguoedgi-ogwinmaklegoed bemarga oyolegegar.

**6** Ar a-ular, emigindi be wergudimarsunnad. Degi-inigwele, amba be wegi sikwas wilubdaklenanaimalad. **7** Ar Jesucristo'gi-be-bensulidi, oloyob qued: Ar orde wilubdaklegegala, soogi dulegergebed. Deyobi, be-nue-Jesucristo'gi-bensulid wilubdaklemogargebed. Ar be-we-Jesucristo'gi-bensulid wilubdaklegedgi-obichale, or-sunna-berguedba bur gandik qued. A-ular, Jesucristo-danikoed-ibagangi bega soglegoed nued be imaksaye, be-nug odummolegoed, degi, begi nueganbi sunmaklegoed.

**8** Ar we-Jesucristo-e-wagar be daksurmar-inigwele, amba be sabmalad, amba bemar egi bensurmalad. A-ular, bemar nue Jesucristo'gi wergudimalad. We-werguedi geg gayagi sogleged, bela-bela nue-yeer itolededid. **9** Ar ade, bemar Jesucristo'gi-bensulidba, bemar abonolenonimalad.

**10** We-abonoleged-igar Bab-Dummad-gayaburba-barsogmalad iduakwaa deun sogsagusmalad, Bab-Dummad na e-itolegedba bemar-abonogoye. A-dulemar we-abonoleged-igar nue-ise-egisagwar baramididii gusmalad. **11** Jesucristo-daged-idaule, Bab-Dummad-gayaburba-barsogmaladga Cristo-Burba-Isligwaled-egi-naid, ega iduar sognai-gusad, wede igi Cristo naibi-itogoe, degine, a-sorBALI, igi Cristo-nug odummolebaloe. DegidBALI, wemar baramidii gusmalad, wede doa-dule, degine, sana wede deyob gubaloe.

**12** Bab-Dummad, e-gayaburba-barsogmaladga oyosad, we-igar bemargadsurye, dulemar-bemar-sorba-danimaloedgadye. Amar unnila we-ibmar-ega-oyosad akwedidii gusmalad. Emigindi, bemarga Bab-Burba-Isligwaled-nibneggi-danikidba Bab-Gayaburba-Nued sogledisunnad. Ar we-ibmar baliwiturmar aisaar nue-dakbi gudidimarmoganad.

## 2. CRISTO'GI BURBA-BINID-NIKGUED (1:13—2:10)

### Bab-Jesús-Igargi swilidik-nanaed-igar

**13** Degisoggu, ibmar-mag-itogega guakwaa be gudii imakmar, nue-itoakwaa be nanamar, degine, Bab-Dummad-ibmar-bega-ukoed, abi unnila bensuli edarbedii be imakmarsun. A-ibmarmar, Jesucristo-gannardanikoed-ibagi, Bab-Dummad nued-bemargi-binsamaidba bemarga ukoed.

**14** Bemar Bab-Dummad-mimmigan uaya-nikaa-damaladsoggu, mer epenne igar-napiragwad-wissuli-gudigusmaladyob gannar be damalo. Deun, bemar na ibmar-abegedba, na be-itolegedba gudii gusmalad.

**15** Melle deyob be bar damalo. Emigindi, Bab-Dummad-bese-gochedi, dule-gwage-isligwaledsoggu, ayob bemar-daegdine na be gwage-swilidik nanamarsun. **16** Ar Bab-Dummad na E-Gardagi sognaid:

“Gwage-swilidik be gumar,  
ar igi an gwage-isligwale, deyob be gumar.”

*Levítico 11:44-45*

**17** Bab-Dummad dulemar ber emarbi dakmaid, degine, dulemar-na-ibmar-imaksamaladba ega igar-nabogoed. A-Bab-Dummadse, Babye, ese be golele, we-napneggi-be-gudiidgi, a-Bab-Dummad-dobekwaa be nanamarsundo.

**18** Be nue wismalad, be-dadgan-be-odurdaksamalad-igargi be gales gudimalanad. A-igargi, Bab-Dummad bemar-onosad. Be-onolesadi, ologi-baklegar be onolessulid, manigi-baklegar be onolessulid. Ar we-ibmardi sunna bergumalad. **19** Be-onolesadi, Bab-Dummad Cristo-abe-sunsoged-nakrusgi-aryosadgi bemar-onosad. We-Cristo, sibad-wawaad-gutu-gwen-nikasulidyo, degine, swilidik-gwen-boni-nikasulidyo, anmar-anar Bab-Dummadga uklesad.

**20** Bab-Dummad, amba yoo we-napneg-nagued-idu bato Cristo-sunonikid, bemarga-uklegegar. Bemar-sabed-ulale, emigine, geb bemarga oyolenonisunnad. **21** A-ular, bemar Cristo'ba Bab-Dummadgi-bensuli gunonikid. We-Bab-Dummad Cristo-burgwisad gannar odulosad, degi, Cristo-nug odungunonikid. Adi, bemar Bab-Dummadgi-dulagudigued edarbedii gumalaga, degine, egi bensuli gumalagar.

**22** Emide, bemar Bab-Burba-Isligwaledgi, igar-napiragwadba nanaed-ular, Bab-Dummad bemar-san-burba uruknonikid. Adi, be gwenadgan nue-napiragwadgi sabgumalagar. Degisoggu, gwage-swilidikidgi na be muchub-muchub ise-nue-sabguar nanamarsun. **23** Ar bemar gannar gwalulenonimalad. Be-gwalulesmaladi, we-ibmar-sunna-berguedgi be gwalulessurmalad. Geg ibmar-berguedgi be gwalulesmalad. We-ibmar-geg-bergued Bab-Dummad-gayaburba-degisadegu-dula-gudiidid. Agi be gwalulesmalad.

**24** Ar ade, Bab-Dummad-Gardagi sognaid:

“Dulemar gaganyobi gued.

E-yeerdaklegedi, nainugi-dutu-achunneyobi gued.

Gaganmala baisur-dinguddaed, dutumala, baisur-batiddaed.

**25** Ar Bab-Dummad-Gayaburbadi

degisadegu maiguad, berguosulid.”

*Isaías 40:6-8*

Ar we-Bab-Gayaburba-Nued bemarga emide soglenonisunnad.

**2** <sup>1</sup>Degisoggu, a-ular, be bela ibmar-isgana-imaked mimarsun, bela emar-yardaked, wagar-darbodaed, aimargi-nobgued, degi, bela gakansaar-aimargi-sunmaked, be obelomarsun. <sup>2</sup>Mimmigan-emisgwa-aidenonikidyob bemar nunis-burbaled-nuedbina be sogmar. We-nunis Bab-Dummad-Gayaburba gued. Adi, agi be gatik nasgumai be-abonolesmaladgi gumalagar.  
<sup>3</sup>Ar bemar bato Bab-Dummad-dulemar-sabed begi na be itosmalad.

### **Jesucristo, akwa-nued-neg-ganikidyobidid**

4Degisoggu, Jesucristo-akwa-dulayobidse be dagmar. Dulemardi isdar a-akwa daksamalad. Bab-Dummaddi na susagusad, degine, we-akwa, akwa-garged-sunnadid, akwa-nuedid. <sup>5</sup>Amba deyob be akwa-duladyob gumarmogad. A-akwa-duladgi Babse-goled-neg-burbaled-soblegedga be gumalad. Deyobi, be dule-irwa-Bab-Dummadse-gormalad-swiqidikidga be gumalad, adi, Bab-Dummadga Babga-ibmar-ukleged-burbaled-nuegan be Cristo-nuggi ukmalagar.  
<sup>6</sup>A-ulale, Bab-Dummad-Gardagi, Cristo-akwa-nuedye-sognaidgi sognibalid:

“¡Be dalmala! Ani an Sión-yalagi akwa-bur-nued-sulealed,  
 negsailaga mesisad.

Ar dule agi bensulile, suli-suli itogosulid.”

*Isaías 28:16*

7Ar a-akwa-Jesucristo’gi be bensurmarsoggu, bemargardi, we-Cristo, ibmar-sunsogedid. Ar dulemar-egi-benmaladgard, Bab-Dummad-Gardagi Cristo’gi-sognaidba gunonikid:

“Akwa dule-neg-sobmaladse-oballesadi,  
 neg-sobleged-e-akwasailaga gunonikid.”

*Salmo 118:22*

**8** Degine, Bab-Dummad-Gardagi sognibalid:

“A-akwa, dule-egi-goo-warmakedga gunonikid,  
 A-akwa-dummad, dule-omukuedga gued.”

*Isaías 8:14-15*

Ar ade, uaya surmarsoggu, Bab-Dummad-Gayaburbagi  
 yoledimarsunnad, ar ade, bato iduar deyob amarga igar-megisad.

### **Bab-Dummad-e-dulamar**

**9** Ar bemardi, dula-sulealed gumalad.

Bemar Bab-Dummad-e-negdakmaidgi, dule-irwa-Bab-Dummadse-gormaladga gumalad.

Bemar dulamar-swilidikid gumalad.

Degine, bemar Bab-Dummad-e-dulamar gumalad.

Bab-Dummad deyob be-susmalad, adi, Bab-Dummad-ibmar-nued-imakedgi be dulemar-baiganga sunmakmalagar, sogmalagar, igi bemar negsichidgi-gudigu, Bab-Dummad be-onosmala, e-neg-meegwad-nuedse be-searmala.

**10** Bemar iduardi, Bab-Dummadgadsurmalanad, emigindi, Bab-Dummadgadga be gunonimalad. Ar iduardi, Bab-Dummad wile be-daksasurmalanad, emigindi, Bab-Dummad wile bemar-daknonikisunnad.

### 3. JESÚS'BA-NANAIMALAD IBMAR-IMAKERGEBED

(2:11—4:6)

#### Dummagan-urbanlikwaa be nanamar

**11** Gwenadgan-sabesarmalad, an bemargi wilemar, we-napneg bemar-negsursoggu, we-napneggi be sikwas gudimarsoggu, mer be-san-ibmar-isganabina-soged be imakmar. Ar we-ibmar-isgana anmar-burba-nued-ebo urwenaid. **12** Gwenadgan, bemar dule-Bab-Dummad-wissurmalad-abargi nued-nanadii be imakmar. Adi, gakansaardule-isganaye-begi-sunmakdimaladi be ibmar-nuegan-imakedbali, a-dulemar, Bab-Dummad-bela-dulemarga-igar-nabodanikid-ibagi, Bab-Dummad-nug odummomalagar.

**13** Bab-Dummad-abemaidda bemar bela dule-dummagan-nugsalesmalad-urbanligwa be nanamar. Rey, bur-dummadsoggu, a-urbanligwa be nanamar. **14** Dummagan-negdakmamaid-urbanligwa be nanamar. Ar wemar, reynuggi dule-ibmar-isgana-imakmalad-sabsur-odurdakega barmilearmalad, degi, dule-ibmar-nuegan-imakmalad-e-nug-ogannomalaga barmilearmalad. **15** Ar Bab-Dummad weyob abemaidd: Be ibmar-nued-imakedba, dule-ibmar-wissurmalad, isdar-begi-sunmakmalad, begi geg ibmar-soge gumalagar.

**16** Ar bemar be-binsaeba be nanamar. Melle we-be-deyob-nanaedi, ibmar-isgana-imakega be ebumar. Bemar Bab-Dummad-mai-napiragwadsunnadsoggu, deyob na be san oyomar. **17** Bela dulemargi binsaed-nikaa be damar. Na be gwenadgan sabgumar, Bab-Dummad-dobekwaa be nanamar. Reygi binsaed-nikaa be damar.

#### Maiga-gudimalad igi-e-dummagangi daoe

**18** Bemar maiga-gudidimalad, be-dummadgi bela nue-binsaed-nikaa be nanamar. Dummagan-nuegan-daedginbi mer be deyob nanamalo. Amba dummag-an-ichakwa-daedgi be binsaed-nikaa dabaloed. **19** Dulemar-Bab-Dummadba-daedba-sabsur-wiledimaladgi Bab-Dummad nued binsadaed. Ar we-dulemala ibmar-oakalossulidba wiledimalad. **20** Ar be-isgudiid-ular dulemar sabsur-be-odurdaker, *jar ibi-nued egi be amiosunna, ar bede isgudiid?*

Ar ibmar-nued-imaked-ular, dulemar sabsur-be-odurdakerdi, wedi Bab-Dummad yeer be-dakdo. **21** Ar Bab-Dummad a-ular anmarse gochad. Ar Cristo amba deyob anmar-anar wilesmogad, anmarga e-wilub na oyosad, adi, anmar eba daegar.

**22** Ar Bab-Dummad-Gardagi we-Cristo'gi sognaid:

“We-dule gwen isgussulid,  
degi, dulemarga gwen gakan-imaksasurbalid.”

*Isaías 53:9*

**23** Cristo'gi dulemar isdar sunmaknanaigusgua, edi gwen dulemargi isdar sunmaksasulid. Dulemar e-wionanai-gusgua, edi gwen dulemar-abin-sogsasulid, anse be oitolemogoye. Ar deyob wilenaigusgua, Cristo bela ega igar-nudakega, Bab-Dummad-igar-inniki-naboged-maidga e-igar na uksagusad.

**24** Ar e-sunnad nakrusgi-bioklenai-gusgua, anmar-issued e-sangi sesagusad, adi, anmar isguedga burgwar gudiguega, igar-innikigwadginbi nanadii guegar. We-Cristo-bemar-anar-naibigusadgi be nuginonimarsunnad. **25** Ar bemar sibad-wawaad-yoggus-gudigusmaladyob gudigusanad. Emigindi, igi-sibad-wawaad e-dule-edarbedse gannar noniki, deyob be gannar Cristo-be-san-burba-akwemaidse nonimarsunnad.

### Abirgunagwar-nanaed-igar

**3** **1** Ar amba deyobmo, omegan, bemar be-sui-urbaligwa be nanamar. Deyobile, be-sui-Bab-Dummad-Gayaburba-abingabisulile, ega be sunmakedba, bur be-daedba Bab-Dummadba nagumaloed. **2** Be-sui nue-innikii-nanae be-dakdagoed, egi nue-binsaed-nikaa-nanae be-dakdagoed. Abali, Bab-Dummad-Gayaburba abingaoed.

**3** Omegan, bemar nue-yeerdakle-guegala,  
we asgi ise-nudakar imakedginsulid,  
sailagia ise-nudakar imakedginsulid,  
ormar-nasikedginsulid,  
degi, mormar-gargemalad-yoedginsulid.

**4** Be-yeerdakleged-napiragwad be-gwage-ulubgi siid.

We-yeerdakleged-napiragwaddi geg bergued. We, yeer-itogedgi-ibmar-imakedid, urwedgi ibmar imaksulidid.

We, degidaedi, Bab-Dummadga bur ibi-nuedid.

**5** Ar epenne weyobi omegan-ulubgi-nue-Bab-Dummadba-akanai-gusmaladi, gudigusmarmogad, gwen Bab-Dummad-bengussurmalad. Amar na e-sui-sogedba ibmar-imakdii gusmalad. **6** Sara be dakena, na e-sui-Abraham-sogedba ibmar-imakdii gusad. E-suise an-dummadye na gordii gusad. Emigindi, be ibmar-nuegan imakmalar, degine, dobsulidba be nanamalar, a-e-sisganga be gunonimaloed.

**7**Bemar, macherganmo, be-omegangi be nue-binsaed-nikaa-nanadii imakmarmo. Be-ome be nue akwemar, ar omegan anmarba bur nollogwad.

Degi-inigwele, Bab-Dummad amba amarga anmar-sunnaa burba-geg-bergued ega uksamogad. Degisoggu, be-ome-e-nug-odummmodii be nanamar. Adi, bemar Bab-Dummadse-gotele, Bab-Dummad be-itomalagar.

### **Ibmar-nued-imaked-ular wileged**

**8** Deginbali, napi an bemarga sogsun:

Bela na be emarbi binsabukwa gumar,  
wile na be dakmaladba, na be muchub-muchub-bendakbukwa  
gumar,  
gwenatigwar na be nue sabgumar,  
wile na be dakmar,  
aigwar na be nanamar.

**9** Dule ibmar-isgana begi imaksale, mer abin ibmar-isgana be imako.  
Dule be-ukabsasale, mer abin imako, bur ibmar-nued ega be uke.

Ar bemar wisid, Bab-Dummad bese gochamaladi, be-susmaladi,  
bega ibmar-nuegan ukegalad.

**10** Ar ade, Bab-Dummad-Gardagi sognaid:

“Na dule nued-gudii gubiele,  
iba-nuegangi weligwar nanadii gubiele,  
ibmar-isganagi-sunmakedgi na e-gwabin bargaergebed.  
E-gaya na gakangi sunmaksuli guergebed.

**11** We-dule ibmar-isganagi banguergebed,  
ibmar-nued imakergebed.

Ulubgi-bogidik-itoged bur amiergebed,  
aba bur nanadii guergebed.

**12** Ar ade, Bab-Dummad dule-gwage-swiqidikid-nue-akwedaed,  
wemar-ese-goled nue itodaed.

Ar dule-ibmar-isgana-imakmaladgindina, egi yoleged.”

*Salmo 34:12-16*

**13** Ar bemar ibmar-nueganbi imakdiile, ¿doa-dule bemar-oakalogosunna? Geg be-oakalomala.

**14** Ar be igar-innikii-maidba-nanaed-ular, dulemar be-wiodiile, begi nued binsalesdo.

“Melle be we-dulemar-ibmar-dobedi dobgumalo,  
melle be gwayebalo.”

*Isaías 8:12*

**15** Bur be-gwagegi be sogmar, we-Cristo’bi an-Dummadye. Ar dulemar bela bese egichialir, ibiga be Cristo’gi-bensulidba degisadegu-dulagudigueb be edarbedimarye. Amar-abinsaega be guagwar-gudii imakmar.

**16** Be a-dulemar-abin-imakder, mer na san-odummogar be sunmako. Nue na san-bargaagwar be a-dulemar abinsaoed. Ulubgi-gwen-isgudisuli-itogedgi be abin-imako, adi, be Cristo-sorda-guedgi dulemar-begi-binsa-gakansaar-sunmakmalad obingegsaegar.

17 Ar ibmar-nued-saed-ular be-wioarmalar, we bur nuedid, ibmar-isgana-saed-ular be wiomaladba. Ar Bab-Dummad deyob abegele, nueddo. 18 Ar Cristo unnila irgwennaa anmar-isgued-anar burgwisad. Cristo-dule-gwage-swilidikid, dulemar-isgana-anar burgwisad, adi, Bab-Dummadse dulemar-nidegar. Napiragwad. Cristo sanar burgwisad. Bab-Burba gannar-dulagudiguega Cristo-imaknonikid.

19 Cristo burbale nadegusad, geb burbamar-galugi-gales-bukmaladga sunmakapid. 20 Ar wemar, epenne Noé-ibagangi, Noé-ur-dummad-sobnaigusgu, Bab-Dummad-igarba gwen nanassurmalad. Bab-Dummad we-dulemar a-urse-doged-edarbedii gusad. Deunni, unnila e-walabaabak (8), muu-mulusadba san-onos gusmalad.

21 Igi Bab-diigi-ogleged emi anmar-abonomogadyobi, we-Noé-ibagangi-dii-mulusad anmarga abonoleged-e-wilubga gunaid. We-anmar-abonolegedi, Jesucristo-gannar-durgusadgi anmar isguedgi abonolesimalad. (Ar diigi-ogleged anmar-sangi ibmar-isgana-naid elisulid. Unnila Bab-Dummadsik-nued-binsaega anmar-imaknonidaed). 22 Ar emigi Cristo nibnegse-nadedgi, Bab-Dummad-argan-nuedsik sigidapid. Cristo bela wemargi obinnonikid: Baliwiturmargi, sailagan-burbarmaladgi, burbar-gangued-nikamaladgi obinnonikid. Degisoggu, bela wemar Cristo-sogedba-nanae gunonimarsunnad.

### Cristo-e-daedba nanaed

**4** 1 Ar Cristo igi anmar-ular we-napneggi dulagudigu naibigusa, anmar deyob naibiguedsik guagwar gudigumogargebed. Ar dule deyob dula-gudiidgi naibiguele, isgued-igargi bar nanasulid. 2 Adi, na e-burgwedse, we-napneggi mer dulemar-galagwensuli-nanaedba bar gudii guegar. Unnila Bab-Dummad-sogedba nanadii guegar.

3 Ar bemarde, epenne dulemar-Bab-Dummad-wissurmalad-ibmar-imaked be imakdii gusmalad. Ar bemar we-ibmar-isgana-imakdii gusmalad:

Be-abgangi-galagwensuli-bingesur-nisaed,  
ibmar-isgana-imakedbina-soged,  
mumguedginbi-nanaed,  
agumakar-iba-onoged,  
bular galagwensuli yeer-itodiid,  
degi, ibmar-bab-dummadga-imakleged-e-nug-odummoged.

4 Ar emigindi, bemar bar we-dulemarba bar akasursoggu, degi, e-ibmar-isgana-imakedba bar imakbarsursoggu, we-dulemar-Bab-Dummad-wissurmalad geger be-dakmalad. Bemargi binnasur urwedidimarsundo.

5 Ar we-dulemar Bab-Dummadga bela na e-ibmar-imaksad sogedsemaloed. We-Bab-Dummad, dulemar-dula-gudimaladga-igar-itoged, degi, dulemar-burgwismaladga-igar-itoged, guakwaa maid.

6 Ar a-ular, Bab-Dummad-Gayaburba-Nued dulemar-burgwismaladga sogleapmogad. Ar amar-e-san sabsur-odurdaklesmarmo-inigwer, e-burbadi Bab-Dummadba dulagudii gumalagar.

#### 4. NEG-BERGUDANIKID-IDU, BAB-JESÚS'BA-NANAIMALAD IGI-DAMALARGEDE

(4:7-19)

**7**We-napneg-bergued-ibagandi owarmaksad. Degisoggu, nue-binsaednikaa be gudii gusun, degine, nue be ataksun, Bab-Dummadse gatik be gorsun. **8**A-ukine, bela bur bule na be muchub-muchub sabgumar. Ar sabguedi, isgumalad-bukidar elied, na muchub-muchub igbarsaye-sogega emar-imaked.

**9**Na be muchub-muchub gwenadgan weligwar-itogedgi be akwemar.

**10**Bemar-war-wargwen gurgin-burbaled-bemarga-uklesadba na be muchub-muchub bendakmarsun. Bemar Bab-Dummadga ibmar nue-akwemaladsoggu, Bab-Dummad-nabir-bemargi-binsaedba gurgin-burbaled-bemarga-eksad nue be ebumarsun.

**11**Ar gwenad-wargwen sunmakele, Bab-Dummad-gayaburba-maid-sogedba sunmakoed. Ar gwenad-wargwen dule-bendakele, Bab-Dummad-ega-gangued-ukedba bendakoed, adi, bela e-ibmar-imakedgi Jesucristo'ba Bab-Dummad-nug dunguegar. Ar Bab-Dummad dummarbaa maid, degi, e-gangued-yeerdaklegedba bela degisadegu-negdakmaid egadid. Ar deyobdo.

#### **Bab-Jesús'ba-naid-ular, naibi-itoged**

**12**Gwenadgan-sabesailamalad, boni-dummaganba beedse be wilub-daklenonidibe, mer be geger itomalo. Ar deyob be gumalargebed.

**13**Deyob be wilearmalar, bemar weligwar itogewilubbid. Ar Cristo-wilesadgi bemar wilenaimogad, adi, Cristo bela-bela-na-yeerdaklegedgi wese gannar magarononikir, eba bemar bela-bela weligwar-itogwichi gumogagar. **14**Ar Cristo-nukad begi-uluar malar, bemargi nued-binsalesye be itogewilubmalad. Ar Bab-Dummad-Burba-Isligwaled-gandikid bemargi maid. Ar dulemar-bemargi-urwedimaladdi, Bab-Jesús'gi isdar sunmakdimalad. Ar bernardi, Bab-Jesús-nug odummodimalad.

**15**Degisoggu, we-ibmar-imakedgi melle be wilemar:

Dule-gindakedgi,  
ibmar-atursaedgi,  
ibmar-isgana-saedgi,  
yogsaar-gotebindaedgi.

Bemar-wargwensaale we-ibmar-imakedgi, be wilege-wilubsurmalad.

Be wilemalale, Cristo'ba-naidgi bur be wilemalawilubbid.

**16**Ar be Cristo'ba-naid-ular be wilemalardi, mer be bingegumalodo, bur Bab-Dummad-e-sordaga-guedba Bab-Dummad-nug be ogannomardo.

**17**Ar odurdakleged-ibagan Bab-Dummad-mimmigangar-inse nonikid. Emide anmar-inse weyob odurdaklenaid, degite, dulemar-Bab-Dummad-Gayaburba-Nuedba-dasurmomaladdi, ¿igi gumalo be insasunna? Ar amardi nue-dummad odurdaklemaloed.

**18 Ar Bab-Dummad-Gardagi soged:**

“Dule-gwage-swilidikid ugak wis abonoledaedde,  
dule-isganamar-bursunna, degi, gwagegi-galagwensuli-gudimalad-  
bursunna,  
¿sunna abonolego be insae?  
Suli. Geg abonolemala.”

*Proverbios 11:31*

**19 Degisoggu, bumar Bab-Dummad-sogedba-wiledimalad, we-Bab-**  
**Dummad-be-obinnisad, bela bega ibmar imakedsedasoggu, a-Bab-**  
**Dummadga na be san urmakdii gumarsun. Deginbali, bumar gatik**  
**ibmar-nueganbi imakdii nanamarsun.**

## 5. UNALEMALAD

(5:1-11)

### Bab-sordagan-idumalad ogannolenaid

**5** <sup>1</sup>Bemar-abargi Jesús'ba-nanaimalad-e-idumalad-gudimaladse  
wilesakwaa an goled. Ani an amaryob Jesús'ba-nanaimalad-e-  
idumogadid. An-sunnagwad an Cristo-wilesad daksamogad. Deginbali,  
yoo Cristo-e-nug-ogannoolealir, an eba nug ogannolemogoed.

**2 Bemarga, an weyob sogdo:**

Bab-Dummad-e-dulamar-bemar-abargi-bukwad be nue akwemar. Igi  
dule-sibad-wawaad-akwed na e-sibad-wawaad-akwe, deyob be akwemar.

Nue yeer-itogedgi dule bega ise-sogar-sogedginsuli Bab-Dummad-  
sogedba be gwenadgan akwemalo. Degine, mer manibina-sogedgi be  
gwenadgan akwemalo. Be weligwar-itogedgi gwenadgan akwemalo.

**3** Degine, be dummaidsoggu, mer be dulemar-akwediid bega gandikidgi  
ibmar-imakega be imakmar. Bur amarga be-daed nued be oyogoed, adi,  
be-ibmar-imakedba damalagar.

**4** Ar deyob be nanamalale, Cristo sibad-wawaad-e-idued-bur-dummad  
gannar danikile, bemarga ologurgin-yeerdakleged-geg-bergued  
uknonikoed.

### Sapingan-ogannolenaid

**5** Sapingana, bemarmoga, girmar-selegan-urbaligwa ibmar-imakdii be  
gumarmo. Degine, bela na be muchub-muchub urbaligwa be nanamar,  
degi, san-bipi na be imakmar. Ar ade:

“Bab-Dummad, dule-na-san-dummarba-imakdimaladgi gwisgudaed.  
Ar dule-san-bipi-imakmaladdi, Bab-Dummad amar-bendakdaed.”

*Proverbios 3:34*

**6** Degisoggu, Bab-Dummad-gangued-asabin na be san-bipii imakmar,  
adi, be-nug-dungued-ibagan-mosale, Bab-Dummad be-nug odummogegar.  
**7** Bemar-surbinsa-itodiidi, bela Bab-Dummadga be ukmar, ar Bab-  
Dummad bela bumar-nue-akwediid.

<sup>8</sup>Degisoggu, nue binsaed-nikaa be damar, nue atakmar. Ar nia-saila-be-isdarad, achumigur-nono-wawaad-uurmakdiyob be-ebilis gudiid. Dule-amidiid, doa-gunnodibeye. <sup>9</sup>Be Bab-Jesús'gi-bensulidba gandik nia-saila-abin be gwisgu. Ar be wisid bela napneg-naidgi be-gwenadgan weyob wiledimarmogad.

<sup>10</sup>Ar Bab-Dummad-dulemargi-bela-bela-nabir-binsamaid bemarse Jesucristo'gi gochad. Adi, na e-ibmar-nuegan-geg-bergued bumar eba nikumalagar. Bab-Dummad bumar-ichesaar-wilesad-sorba, na e-sunnad bumar-nudakoed, bemarga bela ibmar-imakoed, bumar-ogannogoed, degine, bogidik-megegala bumar-imakoed. <sup>11</sup>Degisoggu, Bab-Dummad-nug ogannolesun, degine, na e-ganguedba bela degisadegu-negdakmaid egadga gusun. Ar deyobdo.

## 6. NAPI-SOGLENAID (5:12-14)

<sup>12</sup>Gwenad-Silvano, Bab-Dummadba nue-naimogadid. Abali, an bumar-ogannoega an bemarga garda wis bipisaar narmaksiid. Degine, bemarga oyogegar, we-Bab-Dummadi bumar-abonogewilubsulinad, degite, bumar-abonosad. We-igar, napiragwadid. Degisoggu, a-igargi gatik nanamalo, mer galakumalo.

<sup>13</sup>Jesús'ba-nanaimalad-Babilonia'gi-bukmalad, bumar-sunna-sulesmarmogad, degi, Marcos, Bab-Jesús'ba-naidba an-machiga-gunonikidi, bemarga sogsimalad, bumar nued sogeye. <sup>14</sup>Na be muchub-muchub sabguedgi ise-nue-angaagwaledgi nued-sogeye na ga be sogmar.

Bumar-Jesucristo'gi-akananaid, bumar bela ulubgi bogidik-itosun. Deyobdo.